



40446

I

Mag. St. Dr.

P

Fides.

*Quis putasset, bone Deus etc.
— de notabilioribus fidei
rebus discursus. —*

*Poznaniae typis S. J.
1726.*

*Wi po mienistku
staus pod Wew*

Feol. 2362

XI VIII 65

1000.

Quis putâisset !

Bone Domini, quis sperâisset !


Miratur quidam Nobilis Polonus,
nomine BONIFACIUS, qui nuper ex occa-
sione serię lectionis cujusdam Operis Contro-
versitici, à Jesuita quodam recenter in lucem
editi, ad Fidem Romano-Catholicam ample-
ctendam è Lutheranismò conversus est. Di-
scurrit præterea cum altero Nobili Polono,
cujus nomen VERIDICUS, de notabiliori-
bus Fidei rebus, admodum nervosè
& jucundè.

DISCURSUS HIC

*Omni-
bus, quicunque Veritatem palpa-
biliter apprehendere, suęque Animę Salutem
solicite scrutari atque adipisci non
renuunt*

COMMUNICATUR

Latino, Germanico & Polonico Idiomate
*Per quendam Theologum Polonum.
Superiorum Permissu.*




POSNANIE,
Typis Clari Collegii Soc: JESU, Annò 1721.

Testificor coram DEO & JESU
Christo, qui judicaturus est vivos
& mortuos, & per adventum ipsi-
us, & Regnum ejus: prædica Ver-
bum, inſta opportunè, importunè:
argue, obſecra, increpa, in omni
patientia & Doctrina. Erit enim
tempus, cùm ſanam Doctrinam non
ſuſtinebunt, ſed ad ſua deſideria
coacervabunt ſibi Magiſtros pru-
rientes auribus: & à veritate qui-
dem auditum avertent, ad fabulas
autem convertentur. Tu verò vi-
gila, in omnibus labora &c. 2. E-
piſt. ad Tim: c. 4. v. 1. 2. 3. 4. 5.

40446

I



1. *Bonifacius.* Antequam Religioni
Catholicæ manus darem, prædi-
cti Jesuitæ Lucubrationem ad calcem
usque evolveram: unde alios quoq;
in materia Fidei, Catholicorum Libros
seriò legendi, veritatem investigandi,
doctrinam, omnesq; consuetudines eo-
rum studiosè pericrutandi occasionem
sumpseram. Nunc verò jam in Gre-
mio Ecclesiæ Romanæ constitutus, eti-
am quotidie experior, quid de illa, aut
è converso de Neo-Evangelicorum do-
gmatibus sentiendū. *Sed quis putasset!*

2. *Veridicus.* Magnifice Domine
Frater, tam vehementia, ut adverto,
trahis aut potius eructas suspiria, qui-
bus de pervetusta Bibliotheca tua om-
nem penitus pulverem excutere va-
leres. Ardentes pyroboli videntur de
pectore tuo prorumpere. Quid hæc
significant?

3. *Bonifacius.* Judæi & Gentiles in
monte Calvariæ decepti sunt in audi-
endo, Mat. 27. v. 46. dum enim ex-

clamaret Dominus JESUS, Eli, Eli,
 (quod significat, DEUS meus) existi-
 mabant Eliam vocari. Vetulus ille
 Heli, videndo deceptus est 1. Reg. 1.
 quoniam, dum Anna Samuelis Mater
 cor suum coram Domino effunderet,
 temulentiae notam suspexerat. Cæcus
 ille Isaac palpando deceptus est Gē. 27.
 v. 22. attrectando enim manum Jacob,
 putabat Esau esse. Erravit Michol lo-
 quendo 2. Reg. 6. v. 16. ubi adversus
 possimi Davidis, circa Arcam Domini,
 Processionem & tripudia contumelio-
 sè blateraret. Erraverunt Explorato-
 res informando Num. 13. v. 33. cū de
 terra lacte & melle fluente mentiren-
 tur, dicentes: *Terra quam lustravimus,*
devorat habitatores suos. Saul in tan-
 gendo erravit 1. Reg. 18. arbitrabatur
 enim, se lanceā tangere posse Davi-
 dem, non tamen tetigit.

4. Hæc omnia olim mihi contige-
 rant, dum Prædicantios adversus Pon-
 tificiorum Dogmata, Ritus, & Cæremon-
 nias graviter è suggestu detonantes
 audirem, atq; in suis libris; Catholicæ
 Doctrinæ Articulos, enormiter depi-
 ctos adverterem. Nunc verò experi-
 entia

entiâ didici, quàm turpiter homo, in
audiendo & legendo, in videndo & in-
formando decipi possit. Credebam,
me rem acu tangere, quædam etiam
quasi palpare, & nihilominus erravi,
deceptus sum. *Quis putasset Prædi-
cautios, etiam Viros prudentes ita enor-
miter infascinare & decipere posse!* Ex
altera verò parte, in tenebris, quid-
quid rutilabat, existimabam stellas esse;
in angulis, quidquid sibilabat, Philo-
melas esse; hyeme, quidquid nive coo-
pertum erat, totum niveum esse. Ve-
rùm postquam exortus est Sol, angu-
lum illuminavit, nivem dissolvit, En-
luculenter adverto, id quod splende-
bat, lignum putridum; quod sibilum
edebat, bubonem; quod sub nive la-
tebat, re vera non niveum fuisse.

Quis sperasset!

5. *Veridicus.* Jam pridem comper-
tum habeo, Prædicautiorum artem in
adaptandis Perspiciliis consistere. Quo-
ties de Catholicorum Dogmatibus aut
Ritibus scribunt vel garriunt, perspi-
ciliis molochinis nasum populi ephip-
piare consueverunt, ut quidquid apud
nos agitur, obscurum atq; molochi-
num

num eff. videatur. E contra quando de suis figmentis Ciceroniano stylo differunt, autata adhibent perspicilia. Conciones & lucubrationes suas instar Opticæ omnia transverso modo representantis fabricant: adeo enim pervertunt, depravant, immutant Doctrinam nostram, ut suis, qui mediante optica hac, Ecclesiam Romanam contemplantur, videantur Catholici non pedibus sed capite incedere.

De Communione sub una specie.

6. *Bonifacius.* Nihil me adeo adstrictum olim reddiderat Lutheranismus, quàm *bibere de calice.* Toties corde & ore profitebar, Religionem meam nunquam me deserturum, quavis in omnibus reliquis cum Catholicis convenirem, unice propter Calicem. Didiceram enim à Prædicantiis: *quàm enormis sit rapina & injuria, simplici popello, pretiosissimum Christi Sanguinem contra expressum præceptum ejus subtrahere.* Utique sanguinolenta vulnera tua (halucinatur Prædicans Tobias Herold in sua Epistola, prout & alii communiter discurrere solent) *Dulcissime*

cissime IESU etiam mihi reſeraſti? etiam mihi conſeſſum in Sacro-Sancta Cæna, Anima mea labia Lateri tuo admove-
vere, & inde Divinum Sanguinem tuum exſugere atque bibere, bibite ex eo omnes, ſonat Mandatum tuum Mat. 26. v. 27. Verum ſalutiferos Fontes iſtos obſtruit mihi immiſericors & crudelis illa Papiſta Mater: denegat mihi S. Calicem, quem deſiderat Anima mea, quem admodum cervus ad fontes aquarum. Pf. 42. v. 2.

7. *Veridicus.* En pharmacopolarem pyxidem! quæ foris deaurata cum inſcriptione Alkermes, intus autem ſoli aranearum fornices. En Codicem ſplendidè compactum! intus autem latet doctrina Machiavelli. Utiq; etiam poma Sodomitica exterius pulchra & rubicunda ſunt? intus tamen fætido ſcatent cinere. Utiq; illa Ficulnea Marci II. v. 21. jaſtabat olim frondes & folia? quoniam tamen vero fructu deſtituta fuerat, maledicta eſt.

8. Gen. 37. v. 31. Malevoli fratres venditô Joſeph, tulerunt tunicam ejus, & in ſanguinem hedi quem occiderant, tinxerunt, dicentes: fera peſſima comedit

eum. Mendacium hoc re vera nimis
 crassum & palpabile fuerat, tunica e-
 nim erat integra. Quis crederet ho-
 minem à fera lacerari atque devorar-
 posse, integro inviolatoque relicto ve-
 stimento ejus? Millies tamen crassius
 & palpabilius comminiscuntur Prædi-
 cantii, dum suis persuadere conantur,
 in Sacra Catholicorum Cæna, privari
 populum Sanguine Christi, cum omni-
 no certum sit, sumi ab eodem inte-
 gram & vivum Christum, adeoq; unà
 cum Corpore & Sanguine etiam sub
 sola specie panis. Utiq; hoc Corpus
 sumimus, quod in Cælo ad dexteram
 DEI sedet? illudne exsangue est?
 quæro.

Utrū a-
 pud Præ-
 dicantes
 re vera
 agatur
 de San-
 guine
 Christi?

9. *Bonifacius.* Postquam verò rem-
 penitiùs in Catholicorum Libris ex-
 pend flem, Calicemq; Prædicantium
 ex hoc in illud inclinassē Ps. 74. v. 9.
 (*quis sperasset!*) adverti fæces, id est
 solas fraudes & calumnias. Falsum est
 & palmare commentum, imo blasphe-
 mia Scripturæ S. evidenter recalci-
 trans, blaterare, quòd Laici in Eccle-
 sia Catholica non participant quoque
 de Sanguine Christi. Utique pascun-
 tur

tur à veris & legitimè ordinatis Presbyteris totò integrò & vivò Christò Domino, cum Corpore & Sanguine, Divinitate & Humanitate etiam sub specie panis? *Christus enim postquam semel mortuus & resurrexit, jam non moritur*, inquit Paulus ad Rom. c. 6. v. 9. *Nec solvitur*, Joan. Epist. 1. c. 4. v. 3. Effer autem Christus mortuus & solutus in Eucharistia, si sub una specie haberetur Corpus sine Sanguine, sub altera solus Sanguis absq; Anima & Corpore. Igitur Catholici certò & infallibiliter etiam sub una specie bibunt Sanguinem Christi. Et hìc manifestè animadverti dicta superius Prædicatorum (vaviloquia, *de labiis animæ, quibus è Christi latere Divinum Sanguinem sugere tentant*, imperitorum tantummodo fascinum esse, & crassam nimis imaginationem, quasi verò Christi Sanguinem sugere, bibere, & sumere non aliter possimus, nisi illo modo quo aliàs cerevisia de amphora aut calice hauriri solet. Jam perspicio, Prædicatorios, re vera non de Christi Sanguine, sed potius de sola liquida specie, dulcique Vini sapore sollicitos esse. O

10 *Dé Communionē sub una specie.*

exæcatam pervicaciam ! *Quis sperasset !*

10. Nonné salubrius, absq; vini dulcedine dulcissimô Salvatoris Sanguine potiri in Ecclesia Catholica, quàm apud Prædicantes nec Sanguine, nec Corpore, solo pane & vino perfrui, sicut fundamentaliter docet, firmiterq; credit universa Catholica Ecclesia innixa Sacris Literis e. c. 1. Timo: c. 4. quoniam Prædicantii non sunt Sacerdotes ab Episcopis verè ordinati, qui traditam sibi, conficiendi hoc Sacramentum, Potestatem habeant: sed solummodo Verbi Famuli & Ministri, prout ipsi fatentur. Nonné melius, in unitate & concordia Christiana, vivum & integrum Christum JESUM unà cum Corpore & Sanguine, Divinitate & Humanitate, sub una specie apud nos suscipere? quàm apud vos utramque speciem absq; Christi Anima & Divinitate, sicut docuit Lipsiæ D. Valen. Alberti in sua Professione Fidei de Sacra Cæna, protestando, hanc esse uniformem omnium Lutheranorum Doctrinam. *Quis putasset!*

11. Quod

II. Quod autem de Christi Institutione, & illo textu, *Bibite ex eo omnes*, cum nimia zelotypia garrere consueverunt, callidum re vera, falsitates suas hoc veritatis colore, expedire facandi inventum est, & specialis astus, Populum, qui Rem & Literam superficialiter tantum desiderat, nec facile unum Scripturæ textum cum altero combinare, aut penitus introspicere, verumque ejus sensum indagare valet, in sua pertinacia inextricabiliter continendi. Universalis Romano-Catholica Ecclesia (à qua sola certitudinem & securitatem habemus quòd difacto detur Sacramentum Eucharistiæ à Christo institutum: nullus enim Lutherano- rum vel notitiam hac de re certam consequi posset, nisi Traditionem Catholicæ Ecclesiæ acceptaret, quòd nimirum illa, quæ in Evangelio reperiuntur, ab ipsis Apostolis conscripta, verumque & infallibile DEI Verbum sint) hæc inquam Ecclesia per tot annorum secula, sic intelligit & explicat Institutionem Christi: *Christum Dominum Sanctissimum Sacramentum hoc sub utraque specie instituisse, atque mandasse*

Confer-
tū illud
Bibite
ex eo o-
mnes,
iuxta
verum,
& genu-
inū sen-
sum ex-
pēditur.

dâsse Apostolis (dicendo : Hoc facite in meam commemorationem Luc: 22 v 19.) idem similiter juxta exemplum suum sub utraq; specie benedicerent, consecrarent, conficerent, atq; offerrent, quoniam tali modo cruentum illud Sacrificium in Cruce facilius in memoriam revocatur. Ac proinde Catholici Sacerdotes, quotidie ad Altare DEI idipsum facere consueverunt. Quod verò attinet sumptionem hujus Sacramenti extra Sacrificium, liberum suæ Ecclesiæ Christus reliquerat, quomodo sibi pro circumstantiarum exigentia, commodius & congruentius fore videbitur, sive illud sub una, sive sub duplici specie dispensare. Illa autem verba apud Mat: c. 26. v. 27. Bibite ex eo omnes sic intelligit atq; interpretatur: Nullum hic denotari præceptum sumendi Calicem, omnibus hominibus datum, sed solos protunc presentes Apostolos monitos fuisse, dividerent hunc unum ab ipso Christo consecratum Calicem inter se, ita ut nemo solus, aut duo, vel tres (quod aliàs facile contingere potuisset) Calicem illum penitus exhaurirent, sed omnes quotquot aderant presentes de eo partiperarent. Hoc sensu locutus est Chri-

flus, sic intelligenda sunt Verba ejus, inquit Antiquissima Romano-Catholica Ecclesia cum tot illuminatorum, piissimorum, sapientissimorum millibus. Ex quibus igitur veræ Prudentiæ principiis, potest quis tranquillâ conscientiâ credere, Lutherum cum suo Grege scripturam hanc melius intelligere & rectius interpretari?

12. Utiq; sequimini Ecclesiæ Catholicæ sensum & interpretationem, ubi docet, non esse necesse Cænam Domini vesperi aut circa medium noctis celebrare; nec post sumptionem Agni Paschalis, aut præmissa pedum lotionē, quamvis Christus ipse de hac lotionē dixerit Joan: 13. v. 14. *Exemplum dedi vobis, ut & vos ita faciatis.* Quare igitur ejusdem Ecclesiæ sensum circa prædictorum Verborum, *bibite ex eo omnes*, interpretationem, sequi renuitis? Solam pertinaciam, quam vehementior bibendi vinum appetitus Populo svav. fiat, causamini.

13. Porro præfatam Scripturam, *Bibite ex eo omnes*, Mat: 6. omnino rectè intelligi & explicari ab Ecclesia Catholica, non solum certificamur tot clarissimis;

riſſimis ſignis Veræ Eccleſiæ, cui ap-
preſſa Spiritûs S. aſſiſtentia Jo: 14.
v. 16. ne in errorem prolabi poſſit:
imo vel ipſo lumine rectæ rationis na-
turaliter hominibus indito, quo con-
vinceris, ſecuriùs te Ejus ſenſu niti
poſſe, quàm privatô judiciô proprio,
aut interpretatione nuper natorum ac
continuò inter ſe altercantium & diſ-
ſidentium Prædicantium; verùm e-
tiam aliis compluribûs graviffimîs fun-
damentis.

14. imo. Quoniam etiam reliqui E-
vangeliftæ, ſcilicet Lucas & Marcus,
Cenam Domini deſcribentes, eodem
modo prædicta Verba explicant
quo Eccleſia Catholica. Lucas ait:
c. 22. v 17. *Et accepto Calice gratias
egit & dixit: accipite & dividite inter
vos. Attendite & videte! En mone-
bantur Apoſtoli ut Calicem à Chriſto
benedictum inter ſe dividerent, id eſt,
ne unus, duo, aut tres totum exhauri-
rent, ſed omnes pro tunc præſentes de
eodem numerô Calice participarent,
& ideo refert Matthæus, Dominum
dixiſſe, bibite ex eo omnes. Qua fron-
te igitur audent Prædicantii, ex citariſ*
Mat:

Matthæi verbis, *bibite ex eo omnes*, universale pro omnibus hominibus præceptum effingere? qui tamen aliàs docent, Mandata DEI præsertim perfectè servare, esse impossibile. Marcus autem c. 14. v. 23. inquit: *Et accepto Calice gratias agens, dedit eis, & biberunt ex illo omnes.* Omnes homines? omnes fideles? quæro: nequaquam, solum omnes protunc præsentēs Apostoli biberunt, id est, illi omnes, quibus (ut refert Matthæus) dictum: *bibite ex eo omnes.* Quid Evangelio conformius doceri potest? Quis Verba hæc, *bibite ex eo omnes*, quæ apud solum Matthæum leguntur, rectè us interpretari poterit, quàm ipsimet reliqui Evangelistæ? O mi DEUS, quis sperâset!

15. 2do. Quoniam cuivis rectæ Rationi clarè patere potest, ipsum Christum Dominum hoc significare intendisse, quod docet Romana Ecclesia. Si enim Salvator noster hac voce, *omnes*, omnibus hominibus Calicem præcipere voluisset, utique etiam penes speciem panis eandem posuisset? ast nullibi in Cæna Domini reperitur, comedere

dite *omnes*. Cur distributioni Panis benedicti, non adjungitur quoque vox ista, *omnes*? quoniam ipsemet Dominus frangens eundem Panem dividerat inter Apostolos: idem autem Calix, connaturaliter loquendo, sic dividi non poterat, idcirco monet Discipulos, ipsi inter se bibendo dividerent, & hoc aliis verbis exprimitur apud Matthæum, *bibite ex eo omnes*. Nonne sic evidenter juxta verum & proprium sensum Scripturam enucleamus? *Sed quis putasset!*

16. 3tio. Quoniam Christus ipse præfata Verba (sicut & omnia reliqua perperam ab Adversariis objicibilia) proprio facto suo ita explicat, duobus illis Discipulis in Emaus salutiferam Cænam sub sola specie panis porrigendo, Luc. c. 24. v. 31. Aperti sunt enim mentis oculi ut cognoscerent eum in fractione panis, quo facto, illic ò disparuit Dominus.

17. 4to. Quoniam eodem modo Scripturam & Institutionem intellexerunt etiam reliqui Apostoli Act: 2. v 42. *Erant perseverantes in Doctrina Apostolorum & communicatione fractionis panis.*

Nul-

Nulla hīc mentio Calicis. Nefas quoque foret, si quis pro placito suo, Verbo Divino aliquid superadderet.

18. Quòd autem Paulus Corinthios sub duplici specie communicaverit, Doctrinæ Catholicæ minimè refragatur, concedimus enim Cæleste Convivium hoc in primitiva Ecclesia, nunc sub una, nunc sub duplici specie dispensatum fuisse. Sed vel exinde perspicuè colligitur, non dari Præceptum Divinum, omnino sub utraque specie communicandi. Siquidem autem Ecclesia Christi iustissimis de causis postea statuerat, uniformem sumendi sub una specie modum observandum esse, proinde qui id facere, pervicaciter reluctatur; non diligit Christianam unitatem, sed solvit & lacerat Ecclesiam, & hic est præcursor Antichristi, de qualibus Epistolâ ima loquitur S. Joannes. *Quis putasset!*

19. *Veridicus.* M. Domine Bonifacii, adeo dilucidè & nervosè Veritatem Romano Catholicam circa Calicem in compendium redegisti, simulq; calumniosas Prædicatorum ineptias ita palpabiliter indigitâsti, ut spem concei-

Quantū æstimate-
tur à Præ-
dicanti-
bus Scri-
ptura Sæ-
cra?

B

piam,

piam, te olim experiētiā hae plurimos ad Ecclesiæ Gremium reduciūrum. Sed liceat quoque mihi aliquid de experientia propria superaddere. Quoties contingit Prædicantios, validissimis hujusmodi argumentis à quopiam premi, nec verentur, nec erubescunt etiam dicere, Paulum hae in parte melius quàm reliquos Apostolos Act: 2. egisse. Quare? quoniam Paulus legitur Communionem sub utraque specie Corinthiis distribuisse. Lucam & Marcum Institutionem Christi non rectè descripsisse, Matthæum feliciter veritatem attrigisse, scribit enim, bibite omnes. Ea blasphemiam! nunquid omnes non scripserunt ex instinctu Spiritus Sancti? E converso, dum agitur de bonis Operibus, inquit Lutherus, Matthæi Evangelium non esse ita purum prout Joannis: quare? Matthæus enim clarissimè describit, quomodo Christus exigit bona Opera tanquam omnino necessaria ad salutem, promiseritque talibus Operibus æternam mercedem, ut mox videbimus. Si quidem autem etiam S. Joannes id ipsum in sua Apocalypsi abundè præstat, ideo

ideo rejiciunt Apocalypsum, blasphemantes, non esse Verbum DEI, sed solas phantasticas imaginationes. DEum bonum! dijudicet hic, quicumque suæ salutis amator est, num id sit juxta Scripturam dicere, (sicut Prædicatorum ineptissime jactare consueverunt) & non potius juxta insolentem propriam voluntatem?

Bonifacius. Quis sperasset!

20. *Veridicus.* Ecce adhuc novi aliquid memoriæ occurrit. Ex Doctrina Prædicatorum sequitur, Calicem tantum, non item panem concedendum esse Gregi suo. Quare? quoniam ipsi in hac voce, *omnes, bibite omnes*, agnoscunt præceptum omnibus hominibus datum: habentq; præterea consuetudinem tales ineptas fabricandi consequentias: *hoc vel illud non est præceptum in Scriptura, Ergo est prohibitum*: (prout ordinariè discurrere solent, ubi agitur de adoratione Eucharistiæ, de Processionibus &c.) Jam, neque apud Matthæum, neque Marcum & Lucam (qui Cænam Domini describunt) reperitur penes Panem consecratum, comedite *omnes*. Ergo non

Lutherani solummodo Calicem bibere debent.

juxta Scripturam agunt Prædicautii, dum panem in Cæna sua omnibus distribuunt.

Utrum
Prædicā
tes reve
ra soli
citi sint
de
augmē
to Gra
tiæ Di
vinæ?

21. *Bonifacius.* Tandem Catholicorum argumentis obruti, aliam elabendi scrutantur viam: recurrunt ad Dei Gratiam, asserentes, tali modo augmentum Gratiæ impediri, cum plus Gratiæ Divinæ fortè nancisci possent homines sub duplici specie, quàm sub una. *Sed quis sperasset!* fallacias etiam tali abscondi posse involuero! Ubi quæso in Scriptura habetur, sub duplici specie plus conferri gratiæ communicantibus, quàm sub una? Sed si, ô Lutherane adeo appetis augmentum Gratiæ, cur ad Cænam frequentius non accedis? prout facere assueverunt Catholici. Cur non prætendis majorem Hostiam Sacerdotis, sed præcisè haustum bonum de Calice?

22. Simulant Prædicantes (quis non mirabitur) se augmentum Divinæ Gratiæ zelosissimè promovere! Utiq; vos 5. proseripistis Sacramenta, quibus Gratia DEI insinuari posset hominibus? Utiq; blateratis, non per ipsum Sacramentum, sed solùm per Fidem confer-

ri Gratiā? Utiq; fingitis observatio-
nem Præceptorum & Opera bona non
præmiari Gratiā Divinā? Vos ne qui-
dem scitis, quid nomine Gratiæ intelli-
gendum sit: quis igitur prudens cre-
dere poterit, vestrum in promovendo
Gratiæ augmento zelum sincerum esse?

23. *Veridicus.* Admisceant licet Præ-
dicantii suis Scriptis & Dictis etiam Bi-
samum ex Pego, Spicanardum ex Cam-
bria, Cinnamum ex Maluca, thus ex
Arabia, Ambram de Mosuch, Cassiam
de Catechu, cunctaq; fragrantia aro-
mata, hæc tamen færent: quare?
quoniam enormiter mentiuntur. Con-
ciones & Lucubrationes suas innume-
ris Scripturæ capitibus & versibus in-
struere solent, instar Privilegii, unde
propendent sigilla veluti thecæ pulve-
rariæ in milite: quamvis re vera nihil
sinceritatis, nihil veritatis præferant.

24. *Bonifacius.* Etiam illud non mo-
dicè adversus Ecclesiam Catholicam
animum exacerbaverat, dum informa-
rer, Sacerdotes Romanos subtraxisse
simplici popello Calicem, arrogantiae
& præcedentiæ causâ, ut nimirum spe-
ciale quid præ cæteris haberent. *Sed*

quis putasset! me ita turpiter deui posse. Utique compertum habebam, etiam Imperatoribus, Regibus & Principibus Catholicis non dari Calicem, qui tamen re vera, maximè dum de præcedentiæ Jure agitur, nihil sibi eripi permittunt. Qua igitur fronte hallucinari poteram cum Prædicatoribus, simplici popello eripi Calicem à Sacerdotibus præcedentiæ causâ?

25. Alii dicebant Sacerdotes Catholicos optimè nosse, utramque speciem omnino sumendam esse, ideoque etiam ipsos duplici specie frui: quod tamen secularibus permittere renuunt. Et ecce nunc experiētiâ didici, in Ecclesia Romana etiam Presbyteros extra Sacrificium Missæ, sub una nonnisi specie communicare quemadmodum & alii homines: imo omnes Sacerdotes & Episcopos, ipsumq; Summum Pontificem Romanum, dum in lethali strato decumbunt jam jam æternitatem ingressuri, sub sola specie panis hoc Sacro Vescuntur Viatico. *Quis putasset!*

26. *Veridicum.* Si Prædicatorum lingvæ mucrones forent, certè valerent fortalitium Mendaxopolim armata ma-

nu occupare. Verum adversus Romanam Ecclesiam, jam his temporibus, talibus armis parum proficiunt, quamvis tot concatenarent mendacia, quot olim Samson caudas vulpinas in agris Philistinorum, quas tamen trecentas fuisse scribitur Judi: 15. v. 4.

27. *Bonifacius.* Libenter adhuc scire, num Prædicatorum zelotypia, qua adeo strepitose Communionem sub utraque specie promovent, sit sincera, quamvis defacto erronea?

Utrum zelus promovendi Communionem sub duplici specie sit sincerus?

28. *Veridicus.* Non, non, nequaquam: unica illorum intentio est, Ecclesiae Catholicae reluctari pervicaciter. Proinde, licet Ecclesia omnibus utraque speciem permitteret, ipsi nihilominus tali casu non utramque sed unam tantum distribuere vellent populo. Interim tamen, quoniam in nulla materia talem textum contra nos citare valent, qui populo ita arrideat, tantamque claritatis speciem præferat, quam illum, *bibite ex eo omnes*, ideo continuo jactant vociferantes: En videte, En palpare expressum Præceptum, bibite omnes &c.

29. Hæc autem subdolè & insincerè.

rissimè fieri à Prædicantibus, colligitur
 luculenter ex Scriptis pretiosi sui NB.
 Viri & Patriarchæ Lutheri (cujus do-
 ctrinæ in cunctis se conformare stu-
 dent) qui an: 1522. postquam omnia
 susdeque pervertisset, scribit Tom:
 Ger. 2. Jenæ deinde impresso per Tho-
 mam Rebart hæredem an. 1585. de u-
 traque specie Sacramenti, fol. inver-
 so 88. *Si veneris ad locum, ubi una so-
 lum confertur species, sume unam prout
 alii faciunt: ubi verò traditur utraque
 species sume utramque.* Et quamvis de-
 inde Lutherus nimirum an. 1526. do-
 cuerit utramque speciem sumendam
 esse, nihilominus ibidem immediatè
 subjungit, dicens: *Si contingeret Con-
 cilium aliquod id statuere aut permittere
 (puta duplicem speciem) tunc nos u-
 tramque speciem nequaquam sumeremus:
 quin imo tali casu in contemptum Conci-
 lii & præcepti sui, unâ solùm, aut omni-
 no nullâ uteremur, nequaquam verò u-
 trâque, omnes illos anathematizando &
 execrando quicumque utrâque specie usi
 fuerint.* Hæc expressissimè habentur
 Tom. 3. Ger. Jenæ impresso per Dona-
 tum Richtzenheim an. 1573. fol. 274.

Nunc

Nunc perpendat quivis prudens Christianus, quid S. Mater Ecclesia in salutem Dissidentium præstitura sit? quavis enim consentiret in communem duplicis speciei usum, attamen tali casu Prædicantii insistendo doctrinæ sui Lutheri, unam solùm speciem, aut etiam nullam populo permetterent. Et nihilominus cum tanto nunc strepitu conantur persuadere populo, Christi Præceptum esse communicare sub utraque specie.

De Fide, Justificatione peccatoris, & bonis Operibus.

30. *Bonifacius.* Innumeris ferè vicibus legebam, atque audiebam Prædicantios vociferantes: *Quicumq; vult adherere Papatui, tenetur nuntium remittere vere Fidei & pretiosis Christi IESU meritis, per quæ nos DEUS salvare decreverat: justificationem autem inquirere per nugas humanas, & propria Opera, id est per media ab hominibus conficta, ut auditionem Missæ, aquam benedictam, Peregrinationes, Rosaria, Instituta monastica, discretionem ciborum, merita Sanctorum mortuorum, quin imo eti-*

am Monachorum & Monialium &c. E
converso in Ecclesia Evangelica tota Fi-
ducia nostra in resco Christi Sanguine, e-
iusque prestantissimis meritis per unicè
salutiferam Fidem, sita est. Hujusmodi
lectiones & sermones olim effecerant,
quod zelosissimus Lutheranz doctri-
næ propugnator extirerim. Ast modò,
omnibus exactius investigatis, ipsâque
experientiâ edoctus, ingemiscere co-
gor: Quis sperâisset, in præfatis haluçi-
nationibus, solas fraudes, mendacia &
illusiones reperiri!

31. *Veridicus.* Quoties homines isti
 de nostris Articulis & Ritibus fabulan-
 tur, ita ferè cum veritate procedunt,
 sicut olim Samson cum Segete Philis-
 tinorum, quam succenderat; sicut
 Moyse cum Decalogi tabulis, quas
 confregerat; sicut Jacob cum virgis,
 quas decorticaverat; sicut illa mulier
 Evangelica cum Domo sua, quam e-
 verrendo, panè everterat; imo sicut
 ipse Diabolus cum Jobo, quem ulce-
 ribus oppleverat. Demonstrant se ha-
 bere ingenium Sciolum, sed quo re-
 merè judicent; caput lepidum, sed
 quo Sophisticè carpant & capiant; lin-
 gvam

gvam acutam, sed qua pungunt; os
spumofum, sed quo maculent; nasum
oblongum, sed quo inuncent: Fron-
tem tamen non habent.

Adhuc u-
num occurrit, quod nunquam satis de
mirari possum: nimirum, licet Prædi-
carii ferè omnibus lucubrationibus
suis, enormissimè Ecclesiam Catholi-
cam lacerare & calumniari soleant, ni-
hilominus, quoties contingit Autho-
rem aliquem Orthodoxum succinctè
& nervosè hujusmodi fraudes revelare,
ineptiasque refellere, (quamvis id (va-
rissimè fecerit) illicò furere incipiunt,
vociferantes, se nimis confundi, plus
æquo lædi, ab Authore hoc nonnisi
exulcerari Animos, & oppugnari Cha-
ritatem: proinde se ne quidem di-
gnari respondere ad talia. O homines
fallaces! En novum asinum! hac ira-
cundiâ insufficientiam impotentiamq;
suam ad hujusmodi compendiosa &
nervosa Catholicorum Opuscula soli-
dè refellenda, excusare & palliare ni-
tuntur: cùm experienciâ compertum
sit, totam illorum de Rebus Fidei scri-
bendi aut differendi Artem in fustissimo
nonnisi inanum verborum & perstri-
ctiva-

Quomodo
de indi-
gnari so-
leant
Catho-
licis Scri-
ptori-
bus.

divarum phrasium apparatu consistere, vi cuius valeant legentes, partim multitudine obruere, partim caligine quâdam & confusione involvere.

Doctri-
na Ro-
mana.

32. *Bonifacius.* Totum Systema Doctrinæ Catholicæ circa Fidem, Justificationem peccatoris, & bona Opera satis dilucidè expressum etiam in obviis libris haberi potest. imò docet Ecclesia Romana absq; Fide neminem salvari posse; eamque primùm omnis Christianæ Justitiæ & Salutis fundamentum esse, prout testatur Paulus ad Hebræ: c. II. v. 6. *Sine Fide impossibile est placere DEO: accedentem enim ad DEum, oportet primùm credere quia est, & quòd inquirentibus se remunerator sit.* Proinde omnia illa opera quæ Fidem præcedunt, dicimus insufficientia esse ad Justificationem & salutem consequendam. Et de talibus Operibus (præsertim verò de cæremoniis Legis Mosaicæ) loquitur Paulus ad Rom. e. c. cap. 3. v. 28. *Arbitramur enim iustificari hominem per Fidem sine Operibus legis.*

33. 2do Ut iustificetur peccator, omnino tenetur per veram pænitentiam

cum

cum ipse & fiducia participem se red-
dere Gratæ Divinæ & Meritorum
Christi. Ad quod omnes innumeris
locis urget & adhortatur sub commi-
natione æternæ damnationis tam Vetus
quàm Novum Testamentum, e. c.
Luc: 13. v. 3. *Nisi penitentiam egeritis,*
omnes simul peribitis. Ideirco etiam
quotidie orare assuevimus, *dimitte no-*
bis debita nostra, licet Christus jam pro
omnibus satisfecerit. Veram itaque &
à Christo præscriptam penitentiam a-
genti peccatori confertur ex meritis
Salvatoris nostri Divina Gratia in re-
missionem peccatorum: quam Grati-
am, formalem Justitiam & Justificatio-
nem nuncupamus.

34. 3tio. Ut autem Gratia, quæ ex
Christi Meritis & Divina Misericordia
Animæ penitentis infunditur, conser-
vetur atque augeatur, obligatur homo
sub pæna amissionis æternæ Salutis, se
quoque exercere in Operibus Charita-
tis DEI & proximi, id est servare præ-
cepta, sicut Christus ipse docuerat:
Si vis ad vitam ingredi, serva Mandata.
Mat. 19. v. 17. Ejusque illuminatus
Apostolus Paulus: *Si omnem Fidem*
habue-

habuero, ita ut montes transferam, Charitatem autem non habuero, nihil sum.

1. Cor. 13. v. 2.

35. 4to. Et quidem Opera illa quæ non præcisè naturaliter seu propriis naturæ viribus eliciuntur, sed supernaturaliter adjuvante Gratia Domini nostri JESU Christi etiam præmianda sūt à DEO in futuro sæculo: quoniam Dominus ipse hoc se facturum promiserat Mat: 25. v. 34. *Tunc dicet Rex: venite benedicti Patris mei, possidete Regnum: esurivi enim, & dedistis mihi manducare: sitivi, & dedistis mihi bibere &c.* Et Paulus ait: *Unusquisque autem propriam mercedem accipiet secundum suum laborem. 1. Cor. 3. v. 8.* Et ideo talia opera appellamus merita, non hoc sensu, quasi verò homo propriis naturæ viribus Cælum mereri possit (prout calumniosè & nimis impudenter de Doctrina nostra suos informant Prædicantii) sed potius hoc, quoniam Opera talia per Christi merita & Gratiâ fiunt DEO specialiter grata ac disponentia animam ad vitam æternam, & DEUS præterea iisdem mercedem in Cælo ex misericordia sua pollicetur.

pollicitus est. Unde quivis homo prudens colligere poterit, quomodo juxta sanum & verum Scripturæ sensum, per Gratiā Christi primū iustificemur, tandem etiam glorificemur.

36. Deinde præmianda quoq; sunt alia Opera bona, e.c. Orationes, Jejunia, auditiones Mssæ &c. etiam illa quæ non ex Præcepto sed solum Consilio in DEI honorem facimus, ut sunt: Vita Religiosa cum Votis suis, castigatio corporis, frequentiores eleemosinæ, orationes prolixiores &c.&c. Quare? quoniam Christus Mat. 10. v. 42. etiam respondit: *Quicumq; potum dederit uni ex minimis istis calicem aquæ frigide, amen dico vobis, non perdet mercedem suam.* En Compendium universæ Doctrinæ Catholicæ, præsentem materiam concernentis. Quid rectius? quid vitæ Christianæ & bonis moribus conducibilis? quid Sacris Literis ac rectæ rationi conformius dari poterit? Verum, *O mi DEUS, quis putasset!* salutaria hæc & piissima Dogmata, adeo enormiter à Prædicantibus obscurari, perverti, velari atque contumeliosè deturpari posse, sicut num. 30. advertimus.

mus. Hocce est, illum, quicumque Catholicus fieri quærit, nuntium debere remittere Fidei & pretiosissimis Salvatoris Meritis, suamque Iustificationem ac Salutem per nugas ab hominibus confectas quærere?

37. *Veridicus.* Candidè fateri cogor, in Concionibus & Lucubrationibus eorum, tantum reperiri sinceritatis, quantum lardi in culina Judæorum; tantum veritatis, quantum fructus in illa ficulnea Marci II. v. 21. tantum verrecundæ, quantum pudicitæ in illa meretrice Rahab Josue 2. v. 1. Quotiescunque Prædicantii de nostris Veritatibus coram suis fabulantur, videntur imitari illum, qui per compita discurrens, & quidpiam à longè indigitans, sponsione certavit cum adstantibus, asserendo, patibulum esse cum duabus columnis: ast ubi propius accessissent, adverterunt duos Viros Spirituales mutuò sese respicientes, Breviariū devotissimè recitare.

Qualis-
nam de
facto sit
Fides Lu-
therana?
& in

38. *Bonifacius.* Illa è contra Christi-
meritis apparenter fucata vaniloquia:
Totâ fiduciâ nostra in Christi IESU præ-
stantissimo Sanguine ejusque Meritis, in
Omni-

Omnipotente Gratia sua per salutiferam Fidem sita est: non in propriis Operibus, non in rugis, vanisq^{ue} hominum traditionibus &c. Modò abstergetur cerussa, insistendo suis principiis, re vera sic intelligenda sunt: Sola Fides absq^{ue} bonis Operibus & observatione Mandatorum DEL, salvificat. Modò credas, infallibiliter tibi per Christum peccata remissa, & Vitam aeternam certissimè dandam esse, jam defacto es justificatus, jam procul dubio salvaberis, etiamsi interim nihil boni, sed omne malum perpetrare. Et in hoc re vera (ut mox manibus palpabimus) principalissimus Lutheranismi Articulus consistit.

quo cō-
sistat eo-
rum fi-
ducia ac
securi-
tas?

39. Illinere solent errorem hunc Prædicantii ornatissimâ de Christi Sanguine loquendi formâ, compellantq^{ue} Fidem Salvificam, firmissimam in Christi Meritis Fiduciam, Christianam securitatem & conscientiae libertatem, nimirum quatenus juxta doctrinam hanc nec bona facienda, nec mala fugienda sunt: Quamvis re vera id non Fides, non Fiducia, non vera Securitas dicendum sit, sed potius vana quædam pervasio, quin etiam temeraria

præsumptio, qua omnibus flagitiis & sceleribus aperitur aditus; quæ præfatis aliisque innumeris Scripturæ testimoniis, ipsiq; lumini rectæ rationis è diametro opponitur: pro qua nullum penitus adduci potest fundamentum, præter aliquot perverissimè intellectos textus ex Epist. S. Pauli ad Rom. ubi aliquoties Apostolus *Iustificationem nostram, Fidei, non operibus legis attribuit*: Licet quivis rectæ rationis compos, modò totam Epistolam studiosè evolvat & consideret, palpabiliter advertere possit, Paulum illa solùm opera à Justificatione Christiana excludere, quæ ante Fidem susceptam peracta sunt, imprimis autem Circumcisionem & Legis Mosaicæ Cæremonias. *Quis putasset!*

Pura
Lutheri
Doctrina.

40. Et quidem sic defacto explicari atque doceri à Luthero suisq; Prædicantibus, præfatum Articulum, scripta eorum indignant. Lutherus ante omnia Sacram Scripturam pluribus locis falsificaverat, e. c. in Epistola S. Pauli ad Rom. c. 3. v. 28. & Marci II. v. 24. vocem hanc, *sola*, Fidei appingendo, ut videre est in Bibliis Lutheri

Jenæ

Jenæ per Donatum Richtzenheim & Thomam Rebart impressis. Ubi vero Sacrilega hæc Verbi Divini adulteratio eidem exprobraretur, respondit Tom. 6. Wittembergæ per Lufft impresso an. 1553. in glossa fol. 165. §. 3. dicens: *Quoniam adverto, primum articulum incessanter ventilari à Diabolo per suos hypocritas, idcirco dico, Ego D. Martinus Luther, Domini nostri IESU Christi indignus Evangelista, articulum istum (Fides sola sine omnibus operibus justificat apud DEum) inviolatum relinquendum esse à Cesare, Papa, omnibus Cardinalibus, Episcopis, Sacrificulis, Monachis, Monialibus, Regibus et Principibus, à toto mundo cum omnibus diabolis: ignemque infernalem pro lucro reportent.*

41. Et Tom. Epist. 1. ad Melanch: fol. 345. inquit idem Lutherus: *Pecca fortiter, sed credè eò fortius, et delectare in Christo, qui mortis et peccatorum triumphator est: Ab illo non separabunt nos peccata, licet singulis diebus millies fornicaremur aut homicidium committeremus.* Et iterum in tua Postilla Domestica Jenæ impressa per Christianum

Rodinger hæredem an. 1559. in Con-
 cione super Evangel. Joan. 3. Feria
 2da Pentecostes: *Nullum amplius pec-*
catum in mundo est (loquitur Luther)
præter infidelitatem: Alia peccata in mun-
do, sunt Domini Simonis peccata, veluti
dum Hansellus meus venirem purgat in
angulo, ridemus talia tanquam rectè fa-
cta: ita quoque Fides nostra efficit ne
stercora nostra fateant coram D E O.
 Parcite, quòd tam fatidà adagia (qui-
 bus omnia Lutheri scripta præsertim
 verò colloquia ejus mentalia condita
 sunt) auribus, & oculis obijciam :
 quamvis enim ipse rubore suffundor,
 cogor tamen doctrinam purissimam,
 pretiosi hujus Viri (prout à iustis Prædi-
 cantiis celebrari solet) fideliter refer-
 re. *Sed quis sperasset !*

42. DEUM immortalem ! Ergonè
 Christus DEI Filius ideo in hunc mū-
 dum venit ? ideonè pretiosum fudit
 Sangvinem ? ut securius DEUM offen-
 dere valeamus ! Sed ubi illud ? quod
 Dominus in illa tremenda Judicii sui
 die exprobraturus est etiam iis, qui Fi-
 dei bona opera non adjecerunt, Mat. 25
Ite maledicti in ignem æternum, esurivi
enim

enim & non dedistis mihi manducare &c.
Ubi illud? quod Paulus disertè enun-
tiat. 1. Cor. c. 6. v. 9. 10. Nolite errare:
neque fornicarii, neque adulteri, neque
fures, neque avari, neque ebriosi, neque
maledici &c. Regnum DEI possidebunt.
Ubi omnis morum & Christianè vi-
vendi regula? Quis putasset!

43. *Veridicus.* Quoties cultioribus
& ad pietatem Christianam magis pro-
pendentibus Lutheranis, hujusmodi
sporciloquia è scriptis Lutheri hausta
proponuntur, respondere confveve-
runt, Diabolus rapiat possideatq; Lu-
therum: quid nobis cum Lutero?
sed in cassum. Adhuc enim isti, quo-
rum Doctrinæ, interpretationi scri-
pturarum, atque curæ salutem animæ
committitis, nimirum Prædicantii, i-
dem omnino docent, vobisq; à teneris
instillant. Quamvis interim toto co-
natu desudent, quomodonam præfa-
tum Lutheri errorem cautius dexteri-
usque vobis insinuent, atque svavissi-
mis de JESU Christo phraibus condi-
ant, ut incautis arrideat. Paucula ex
innumeris afferro: Niclas von Ams-
dorff Prædicantius in præfatione ad

Prædi-
cantes ad
hæc usq;
tempora
veri sūt
Luthe-
rani,

prunam partem omnium Lutheri operum an 1564. impressorum ita halucinatur: *Sanctus ille ac pretiosus Vir Dei Lutherus, perniciosissimam heresim quam nulla unquam perniciosior in mundo extiterat, quod nimirum bona Opera ad salutem sint necessaria, strenue & efficaciter refutavit & expugnavit. Imo etiam Valen. Löscher Superintendentens Dresnensis in suo Literario Commercio nuper adversus Sanctitatem Baptismi Romano-Catholici edito, pag. 11. docet inquit: Unica via ad damnationem est infidelitas seu non credere. Et pag. 13. Fœdus Baptismi quotidie nos certificare debet de salute consequenda. Talia, hisque similia asserta, quæ cum præfato perniciosissimo Lutheri errore omnino conveniunt, in omnibus ferè Prædicantium Lucubrationibus reperiuntur.*

Quid
de eorū
Catechi-
smis, Cate-
chi-preca-
torisq;
libellis
sentien-
dum?

44. *Bonifacius.* Jam autem in Catechismis minutioribus, libellis prætoris & cantilenis, Doctrinam suam, quasi vermiculum Indicum ipsi holoserico implicare videntur: nimirum Verbis ad speciem Sanctis de Christi Domini Meritis, de Dulcissimo Nomine JESU,

JESU, de Amore DEI, ejusq; mandatorum observatione, adeo cautè ut errores vix agnosci queant. Idq; ideo, ne aliàs homines ad virtutis tramitem procliviores, à se suisq; Dogmatibus arceantur. Maxima ferè pars solis Catholicorum phrasibus, orationibus & affectibus adornari solet: Centies ingeminari advertes: DEUM timere, eumq; super omnia diligere debemus, vitam sanctam ducere, præcepta DEI servare, lucrari per Sacramenta Gratiæ Domini nostri JESU Christi &c.&c. Superaddunt præterea etiam paululum de propria doctrina sua, sed obiter & admodum circumspectè, e. c. quamvis per talia opera non mereamur Vitam æternam. O Cretenses, semper mentientes! quàm ingeniosè populum Christi Sangvine redemptum decipitis! Hæc enim omnia dulciloquia, tandem post multa vaniloquia, in hæc omnino turpiloquia desinunt: *Debemus quidem DEI præcepta servare et bene agere, nihilominus quamvis id non faceremus, infallibiliter tamen salvabimur, modo firmiter, sicut DEUS, DEUS est, et sicut Scriptura, DEI Verbum*

C4 est,

est, credamus, nos per Christum salvandos.

45. Et hic otiosi sermonis scopus est. Sed quis tali insistendo Doctrinæ, quidpiam boni agere, aut piè vivere vellet? quis præcepta servare, à flagitiis declinare, destructa reparare, ablata compensare, ad novam denique vitam contra pristinæ consuetudinis obicem eluctari conabitur? Si absq; tot impensis, æq; benè, & multò commodius, imò millies securius vitam æternam adipisci valeat, modo credat id omnino futurum esse. Verùm cur Prædicantii hanc enormem doctrinam suam non sic palam & sincerè omnibus aperiunt? quia de causa Catechismos, precatoriosque libellos Catholica loquendi methodo depingunt? ideo ut sui, quicunq; ad pietatem Catholicam magis propendunt, arbitrentur Disciplinam suam cum nostra in substantiis convenire, (licet compertum sit, tantum ab ea distare, quantum à Cælo Empyreo gehenna) taliq; industria facilius in errore contineantur. *Quis putasset!*

46. *Veridicus.* Nonnè verum: Verba

ba mellea, corda tellæ; Aurea retia,
ferrea pretia; Patula pulchritudo, oc-
cultæ turpitudine; Blandientes oculi,
latentes scopuli, Amæna cilia, falsa
perspicillia. Exterius facula, interius
macula; Extrinsecus Pastor, intrinse-
cus impostor.

47. *Bonifacius.* Ars hæc in quam
Prædicantii diu noctuque incumbunt,
ut nimirum Dogmata sua splendidè ef-
fingere, nostra verò turpiter proci-
dere valeant, quoniam compellenda sit
nomine, anceps hæreo: profectò
Theologiæ vocabulum nequaquam
meretur.

48 *Veridicus* Artem sartoriam esse
dicerem, quæ docet centones sarcire,
integrum verò pannum scindere. Da-
lila Samsoni crines Jud. 16. v. 19. Ha-
non Davidis Emissariis vestimenta &
barbas absciderat, 2. R. 10. v. 4. arte
autem hæc fama & veritas proci-
ditur. Satiùs tamen magiam dæmonia-
cam appellavero, quam Lutherus cum
Diabolo de abroganda Missa disputans,
didicerat, ut videre est in Tom. suo 7.
de Missa privata.

De Cultu & Invocatione Sanctorum, ac S. Imaginibus.

49. Bonifacius. Præterea in Libris eorum satis fusè exaratum reperi: *quàm abominabilis Idololatria apud Catholicos exerceatur, dum scilicet Sancti, eorumq; simulacra, statuae, ligna, saxa, & trunci Divino cultu adorantur. In Papatu (calumniatur e. c. Hunnius Prædicans in suo famoso libello, pellis ovina Romanæ Ecclesiæ detecta, nuncupato) coguntur homines mortuorum Sanctorum merita inquirere, Idololatriam, aliasque innumeras impietates exercere, vel saltem iis non refragari; Phariseorum Iudaismo imo Paganismo, multisq; hæresibus, quæ in Romanam Ecclesiam enormiter irreperant, implicari.* Alii verò cum Prædicatio Heroldi superaddunt: *Domini DEum tuum adorare, ipsiq; soli servire debes, Mat. 4. v. 10. Ast Ecclesia Papistica traditionibus suis præcipit tibi, ut non solum DEum, verùm etiam Mariam aliosq; adores. Monstrat Sanctorum merita, quasi verò inexhaustus tuorum Meritorum Thesaurus, cruentate*
pro

pro me dulcissime IESU! non satis foret ad salutem hominum comparandam.

50. Iis vero de suo Gremio Viris, quibus huiusmodi convicia adversus Catholicos eructata duplicere solent, jam aliter res proponitur: e. c. sic: *Querant Catholici varios eosque complures Patronos: nos unicum habemus Dominum nostrum IESUM Christum, Mediatorem inter DEum & hominem: experiemur aliquando, uter Patronus magis prodesse valeat. Vel adhuc aliter: Indignentur licet omnes Sancti, modò Christum propitium habeam, parum ista curabo. O deceptores populi (respondent ad hæc Catholici) nunquid possibile, ut Christum habeas propitium, dum fideles Servos suos & Amicos despicias? utique scriptum Luc: 10. v. 16. *Qui vos spernit, me spernit?* Aut quomodo Sancti in Cælo regnantes indignari tibi poterint, si Dominum eorum, Amicum re vera habueris?*

51. *Veridicus.* Prædicantii omnibus omnia facti, sed non cum Apostolo: blandiuntur cum Joab, ferociunt cum Cain; osculantur cum Juda, insidiantur cum Herode; zelant cum Caïpha,

Simu-

simulant cum Pilato ; gloriantur cum Phariæo , cavillantur cum Saducæo. Lambunt sicut cati, lacerant sicut Tygrides, modulantur sicut cygni, insidiantur sicut vulpes. Mentiri, decipere, calumniari, pro scrupulo non reputant, quoniam per solam Fidem salvari volunt.

52. *Bonifacius.* Jam defacto verus & sincerus existo Catholicus : quidquid aut quomodo in Ecclesia Romana agatur, bene perspectum habeo : ac proinde manibus palpo, omnia Prædicatorum scommata decipulas esse. Attendite & auscultate, quotquot estis moderatiores Lutherani ! En jurejurando testor DEum cordium scrutatorem, me nunc multò acrius quam antè, omnes quotquot purum aliquem hominem Sanctum sicut DEum adorarent, aut Imaginem quandam sicut Idolum colerent, execrari & anathematizare. Insuper profiteor, si quis Christum Dominum nostrum non veluti unicum Redemptorem, Mediatorem & Salvatorem Mundi diligit & honorat, anathema sit : & qui dixerit, hominem aliter salvari posse quam per
Chri-

Christi JESU merita, anathema sit. Sic enim docet Conc. Tridentinum, sic summe tenet, facitq; Univerſa Romano-Catholica Eccleſia. DEum immortalem! Utquid igitur Prædicantii adeo imprudenter mentiuntur? Cur adeo temerè illis creditur? Fortan idè, quoniam advertitis Catholicos ante Sacrorum Imagines genufl. cten-tes orare, e. c. Sancta Maria ora pro nobis Christum, S. Petre, S. Paule orate pro nobis? Sed nunquid vobis incompertum etiam in aliis materiis & actionibus, opus externum juxta interiorem hominis Intentionem (quam etiam continuò vobis manifestamus) judicandum pensandumque eſſe? *Quis putàſſet!*

53. *Veridicus.* Narraverat mihi quidam Peregrinus, se in Veſtphalia ad publicum Diverſorium divertisse, quò plurimi helluones protùe confluerant, & inter cæteros etiam duo Laniones crapulam edormituri: qui (inquit ille) ità horrendè ſtertebant, ut unus ronchizando cubiculi januam patefecerit, alter verò respirando attraxerit, adeo ut janua tota nocte continuò pandere-
tur

tur & clauderetur. Exaggeratio hæc fuerat nimia. Ego verò parum dico asseverando, Prædicantios horribilioribus ronchis afflare Christi Ecclesiam. Interim tamen quoties contingit, Authorem aliquem Catholicum barbarissimos hujusmodi seriò redarguere, adhuc audent indignari, blaterantes, en cavillatur, en calumniatur &c.

Intentio
opera
externa
discriminat.

54. *Bonifacius*. Externa cultûs & venerationis signa, e. c. inclinari, genuflectere, prosterni, rogare, reverentiam exhibere &c. sunt actiones indifferentes, & reputantur bonæ aut malæ, tales vel tales juxta interiorem hominis intentionem. Alia intentione genuflectimus coram DEO, alia coram Rege terreno, alia coram Parentibus liberi, alia debitor coram creditore, alia coram Virgine Proculus &c. Sic etiam in omnibus Catholicorum Ritibus, Cæremoniis, Verbis & Operibus spectanda est intentio. Coram Christo Domino genuflectimus tanquam DEO & Salvatore nostro, eumque invocamus veluti unicum talem Mediatorem, qui nos redemit & Sanguine suo reconciliavit Patri, in quo
veluti

veluti omnis boni fonte, tota collocanda fiducia. Coram Sanctis inclinamur, eosque invocamus jam diversa toto Cælo intentione, nimirum tanquam Christi Servos & Amicos, qui unâ nobiscum ante Dominum procident, eumque deprecantur, orent atq; adorent. Ante imaginem inclinamur coram eo quem Imago denotat. Papam veneramur tanquam Christi Vicarium & præcipuum ejus in terris Famulum, quo facto ipsum Principalem id est Christum speciali cultu prosequimur &c. *Quis putasset!*

55. Et quidem has intentiones nostras nemini celamus, sed tot scriptis & dictis, candidè omnibus divulgamus, adeo ut nec pueros in scholis, nec vetulas in Nosocomiis lateant. Nihilominus tamen Prædicantii à suis Idolis abstinere nequeunt.

56. Utrique vos Sanctorum Festa celebratis: quid hoc aliud est quam colere Sanctos? & quidem eo cultus genere, qualem nemini mortalium exhibere licet. Vos ne quidem adorare DEum potestis etiam in Spiritu, nisi prius in cerebro efformetis DEI Imaginem

Lutheri
rari &
Calvini
certas
habent
imagines
quas
colunt.

ginem, in cujus deinde repræsentatione inclinationes & adorationes exhibere soletis. Nunquid imago in capite non est æque creatura ac imago in pariete? Vos singulari cultu prosequimini Biblia, stringendo, delibando, verumque DEI Verbum compellando, cùm tamen Scriptura, defacto nonnisi materialis, Divini Spiritualis Verbi expressio sit. Si igitur talem expressionem & imaginem, quæ in literis syllabisque consistit, & à Typographo, atro colore exaratur, colitis, cur nefas arbitramini, alias queque imagines quas rubeo aut cæruleo colore pictor adumbravit, simili modo honorari? Quoties vox ista, *IESUS*, devotè proferitur, inclinando caput, galerum subito detrahitis: igitur idololatriam exercetis? utique vox ista, *IESUS*, imago vocalis est, signumque materiale expressivum Domini nostri JESU Christi, in duabus syllabis consistens, æque creatura ac omnes aliæ Imagines? O cæcitas! ô pervicacia! *Quis unquam sperasset!*

57. *Veridicus.* Consueverunt, suos mortuos pingere ante Crucifixi Imaginem.

nein genua flectentes & conpositis manibus orantes : vivi autem id ipsum facere reculant. Non habetur pro Idololatria, si quis Dissidentium Iconem suæ Amasiæ utraque manu stringat, pectori applicet, exosculetur, nec non cum singulari reverentia asservet. Similia autem exhibere, Christi Salvatoris, aut B. ejus Genitricis, ac ceterorum Sanctorum Iconibus, nefas est.

§8. *Bonifacius.* In quonam verò Doctrina Catholica de Cultu & Invocatione Sanctorum consistat, ex obviis libris facile colligitur. *Primò* docet Romana Ecclesia colendos venerandosque esse Sanctos tanquam Servos & Amicos Christi. Quare? ubi id scriptum? ideo, quoniam ipsemet Æternus DEus Pater eos honorat: *Si quis mihi ministraverit, honorificabit eum Pater meus.* Io. 12. v. 26. Honorat eos DEus Filius: *Vos qui secuti estis me, in Regeneratione sedebitis super sedes duodecim &c.* Mat. 19. v. 28. Honorat & Spiritus Sanctus, e. c. per Ecclest: *Laudemus Viros gloriosos & Parentes nostros in Generatione sua,* c 44. v. 1. *Sapientiam ipsorum narrent Populi, &*
D lau.

Doctrina Catholica de Cultu Sanctorum.

laudem eorum nuntiet Ecclesia &c. v. 15.

De Bea-
tissima
Dei Ge-
nitricis.

Angelus Gabriel Nomine totius SS. Trinitatis salutatur & honoratur B. DEI Genitricem Mariam : *Ave Gratia plena Dominus tecum , benedicta tu in mulieribus &c.* Tu verò ô miser homuncio, tu elea vermium, tu sacce stercoreum, tu lacuna sordium, eam salutare atque venerari reluctaris? tu honoris locoò blasphemias ac contumelias afficis? *Quis putasset!*

59. *Veridicus.* Beatissima Virgo Maria, quæ Salvatorem mundi 9. mensibus sub Cervice suo gestavit; uberibus nutrit; labore manuum suarum educavit; unà cum ipso contemptus, persecutiones, exprobrationes, omneque mundi miseriam constanter pertulit, sub Cruce ad supremum usque exitum perstitit; Illa Virgo Mater admirabilis, cui Angelus : *Benedicta tu in mulieribus.* Cui Elisabeth : *Beata tu.* De qua, illa mulier in Evangelio : *Beatus venter, qui te portavit.* Quæ plena Spiritu S. prophetizaverat : *Ecce enim ex hoc, Beatam me dicent omnes Generationes.* Hæc DEI Mater ordinariè in scriptis Prædicantium solum Maria

appellari solet, ita ut Eam nequidem
titulò *Sancti*, *Beati*, aut *Benedicti* di-
gnari; quin imo blasphemò peccatri-
cis vocabulò proscindere assueverint.
E contra Lutherum suum, cujus im-
mundities, evidenter colligitur, non so-
lùm ex sacrilega violatione Monialis,
verùm etiam ex spurcissimis Lucubra-
tionibus suis, quas ipsi Prædicantes
(DEO adversùs Lutheranismum sic
permittente) Typis mandârunt: hunc
inquam Lutherum appellare solent, Vi-
rum Sanctum, Beatum Doctorem, pre-
tiosum Virum DEI, quintum Evange-
listam (juxta quem se quocq; Evange-
licos nuncupant) zelosum Eliam &c.
O munde immunde!

60. *Bonifacius*. Secundò præbet no-
bis Ecclesia salutare Consilium invo-
candi quocq; Sanctos, non sicut Chri-
stum invocamus, sed diversò omnino
modo, nimirum veluti famulos ejus,
qui nobiscum & pro nobis eundem
Dominum deprecantur. Quare?
Quoniam Sanctorum Invocatio & fun-
datur in Scriptura. & Christum maxi-
mè honorificat. Profectò, si Paulus
deiderabat etiam à mortalibus & ad-

Invoca-
tio San-
ctorum
confor-
mis est
Scriptu-
ræ.

huc peccatis obnoxius hominibus ut pro se DEum orarent: *Obsecro ergo vos Fratres per Dominum nostrum IESUM Christum, & per charitatem S. Spiritûs, ut adjuvetis me in orationibus pro me ad DEum. ad Rom. 15. v. 30.* Si DEus ipse præceperat: *Ite ad servum meum Iob, ipse orabit pro vobis, faciem ejus suscipiam, ut non vobis imputetur stultitia. Iob. 42. v. 8.* DEUM bonum! Cur à Sanctis in Cælo, qui in Speculo Divini Vultûs necessitates nostras perspicuè intuentur, non licebit quoq; exoptare similia? *Quis putasset!*

61. Utrique Angelus orabat pro Populo, dicens: *Domine Exercituum usque quo non misereberis Ierusalem. Zacha. 1. v. 12.* Utrique Petrus ipse promiserat id se facturum in altera Vita: *Dabo autem operam & frequenter habere vos post obitum meum, ut horum memoriam faciatis. 2. Petri c. 1. v. 15.* Verbo, qui invocare Sanctos, pervicaciter renuit, vel arbitratur cum Epicuro, Animas post hanc mortalem vitam dormire aut mortuas esse; vel communionem Sanctorum in Apostolico Fidei Christianæ Symbolo contentam

non credit : qualem enim aliàs Communionem haberemus cum Sanctis ?

62. Præterea millies magis honorificatur Christus Dominus per Invocationem Sanctorum, quàm aliàs. Quid enim re vera est invocare Sanctos ? Non est dicere, (sicut Prædicantii impudentissimè fingunt) Sancte , fac nobis hoc vel illud propria virtute & auctoritate : aut, Sancte, ora tu pro nobis, nos interim otiamur. Sed invocare Sanctos , idem est ac convocare illos , ut unà nobiscum coram Divina Majestate procedentes , adorent, laudent , benedicant , orent atque deprecantur Dominum nostrum JESUM Christum , ut Gratiâ suam nobis largiatur. Nonnè sic magis colitur Christus, quàm dum pervicax peccator, gallerò natò inpositò, arrectaq; fronte Regem Cæli & terræ alloqueris ? *Nonne sic verè laudamus DEum in Sanctis suis, Ps. 105.* Quid Scripturæ, rectæque rationi conformius ? Quomodo nunc subsistit impudens illa Prædicantium calumnia num 49. adducta ? En verè descriptam habetis Catholicam Do-

Christu
millies
magis
honorificat.

ctinam, hanc oppugnent Prædicantii, si valent, non sua figmenta.

Modus, 63. Dicit hic quispiam: sed ad-
sed ad huc fortè habent nostri spirituales quid
hæc vos- in contra afferant. Respondeo, ha-
sunt vo- bent, sed nihil ad rem, nec quidquam
stri re- tale, quod in comparatione istorum
sponde- quæ hætenus diximus ullum pruden-
te, con- tem virum valeat convincere. Utique
vellitur. nullus Fidei Christianæ datur Articulus,
 adversus quem multæ fuitiles blaterationes conglomerari nequeant. Proinde quicumque Veritatis Catholice argumentis convictus, eam nihilominus tergiversatur amplecti, similis est illi famelico, qui idcirco cibum sumere recusat, quòd reperiri possint tales, qui venenò imbutum esse, temerè asserant.

Lutheri
 Patro-
 nus.

64. *Veridicus.* Jam intelligo, quæ de causa, Prædicantii Cultum & Invocationem Sanctorum ita fervidè persequantur. Luther enim suus Doctor alium olim Spiritum in Patronum adoptaverat. Quem Spiritum? fol 286. & 288. mensalum, solitus erat exclamare, *Sancte Sathana ora pro me.* Et fol. 122. c. 12. inquit: *Diabolum per-
 sæpè*

sepe in lectulo sibi accubuisse. Et fol. 251. extollit eum supra omnes sanctos Angelos, dicens: Quantum Demones sint supra Angelos, patet exinde, quod unus Diabolus etiam pluribus Angelis negotium facessere soleat. Et fol. 32. f. retetur Luther de templo: Conscientiâ convincor, me Diabolum magis quam DEUM dilexisse. Et Tom. Ger. 5. Jen. impresso fol. 259. multum honorificè de eo loquitur, dicens: Mallem à Diabolo quam à Cesare interimi, sic enim Præstantiori Domino succumberem. Et iterum Tom. 3. Ger. Jen. fol. 47. Scriptura ait, nos Diaboli captivos esse tanquam nostri Principis & Dei, adeo ut necessitemur id facere quod ipse vult, nobisque ingerit. Hæc & similia innumera ab ipsis Prædicantibus in lucem publicam edita sunt.

65. *Bonifacius.* Non possum satis gratiarum referre præfato Jesuitæ, quod lucubratione nuper edita occasionem mihi porrexerit, Veritatem seriò indagandi, & vel ideo facili negotio assequendi.

66. *Veridicus.* Ego autem non possum satis demirari, M. Dominationem

tuam evolvendis Catholicorum Libris, iisque sollicitè perpendendis tantum curæ & studii contulisse. Videntur enim plerique Domini Dissidentes consuetudinem non habere, Controversias Catholicorum (præsertim si paulò fusius instituuntur) suaditùs relegendi, multò minùs cum suorum Prædicantium Responsionibus studiosè combinandi. Sed ordinaria periversione hac contenti sunt, quòd nimirum sui Spirituales facili negotio talia valeant refellere.

Quomodo
Catholico-
rum Li-
bri Con-
trover-
sistici
refutari
soleant.

67. Porro vanam periversionem hanc versuta Prædicantium jactantia procreare consuevit. Modò enim nervolum aliquod Catholicorum Opusculum in lucem prodeat, illicò reponunt fusissimum quoddam summarium: statimque prima fronte juxta consuetudinem debacchari, vilipendere, calumniari incipiunt: nugas esse, effætas antiquitates jam nullas à suis Theologis enervatas: (licet procul dubio, nihil hætenus solidi contra nos attulerint) nihilominus ad confundendum phantasticum Ingenium, velle se pauca quædam, obiter proponere, (quod tamen

tamen fusissimè instituitur) unde prudens Lector colligere queat , quàm infirmum sit , quidquid adversus purissimam NB. Doctrinam suam adducitur.

68. Inchoant itaque Verbis ad speciem piissimis , *in dulcissimo IESU Namine* : intermiscunt plurimos Scripturæ textus , de pretioso Christi Sangvine, ejusque Passione & Meritis, de Fide salutifera, de Spe & Fiducia &c. citant caput & verbum exactissimè : quibus tamen omnibus re vera solum aërem verberant. Tandem etiam sibi met ipsis applaudunt : en jam enervata, convulsa, confRACTA , contrita sunt pariter omnia. Tale volumen occasionaliter arripiunt illi de suo Gremio seculares , qui propter temporalia negotia non libenter multum legunt. Non dubito (ait quispiam) refutationem hinc omnino solidam latere : quare ? tam multa enim è Scriptura, atq; de Svavissimo Domino IESU , non sine phrasium elegantia , congesta esse adverto.

*Controversiarum Clausula, quæ
omnia Prædicatorum objecta-
menta funditus evertere; &
quemvis salutis suæ studiosum,
ad Religionem Catholicam
convertere posset.*

Quid
Diffide-
res in
Die Ju-
dicii re-
spōsurus?

69. *Bonifacius.* Vehementet me ad
legendum sermōque perpendendum sti-
mulaverat illud, quod ab uno Authore
adducitur, nimirum: Si nunc, nulli
Catholicorum argumento, debitè re-
spondere vales, Bone DEUS! quo-
modo igitur in illa die novissima, su-
premo Judicii ad mille, unum reponere
poteris? Et hæc in mentem venerat:
quando ante Tribunal DEI com-
parebo, & Dominus percontabitur,
qua de causa in Fide Lutherana vivere
& mori decreverim? Quid reponam?
Si juxta Prædicatorum morem dixe-
ro, quoniam verum, clarum, purum
Verbum DEI cum firma Fide, sectari
volebam: rursus urgebit Dominus,
ex quibus rectæ rationi consentaneis
fundamentis, credideras firmiter, ha-
beri in Lutheranismō verum, clarum,
purum

purum Verbum DEI, ejusque rectam Interpretationem? quamvis perspectum tibi fuerit, Universam Romanam Catholicam Ecclesiam cum innumerable Doctissimi norum Virorum, torque credibilium Testimoniorum caterva, reclamasse, omnibus indigitasse, Scripturam à Luthero adulteratam, suam suorumque Prædicatorum Interpretationem falsam esse, & confictam contra uniformem Ecclesiæ Christianæ per 1721. annos sensum & explicationem. DEum immortalem! quid ad hæc respondere potero? maxime, cum ab omnibus exigatur, ne in re tanti momenti, quanti Fides est, perfunctorie aut dubitanter nos geramus; sed ut Veritatem sollicitè inquirentes, id quod securius nobis apparet, eligamus.

70. Si allegavero spiritum meum privatum, inquiens: ita putabam, sic arbitrabar sumendam esse Scripturam, existimabam in hac Fide salvari posse: En reponet Justus Judex: cur Spiritum tuum seriò scrutando, juxta mandatum meum non examinasti? Utique scivisti, omnes sectas, quorquor veram Ecclesiam deseruerunt, putasse, in sua

Re:

Religione te vitam æternam adipisci posse? Scripturam clarè sibi favere: imo Joan. 6. v. 2 *arbitrabantur homines obsequium se præstare DEO*, interficiendo Apostolos; hoc tamen putasse, hoc arbitrari nequaquam eos coram me excusaverat.

71. Si dixerò, talem me Scripturæ nucleum à Prædicantibus accepisse: detonabit Dominus exclamans: Poterasne quierâ conscientiam illam Doctrinam & interpretationem Scripturæ repudiare, quæ in Ecclesia Christiana, cum tanto consensu per tot secula acceptata; à tot piorum, doctorumq; Virorum millibus prædicata; tot Martyris & Miraculis comprobata fuerat? E contra verò novæ huic adherere opinioni, quæ primitus ab uno monacho inventa est, qui excussâ Religiosa disciplinâ jusjurandum transgressus, & innixus Principum secularium favori, Ecclesiasticæ Potestati palam recalcitavit: cujus mores & codices adeo scandalosi fuerant, ut te ipsum puduerit, Lutheranum appellari? Quam Opinionem atque Scripturæ interpretationem promulgârunt Affeculæ ejus
nimi.

nimirum Prædicantii, qui se invicem propria authoritate sine Episcoporum Ordinatione & Missione, contra antiquissimam Ecclesiæ praxim, functionis hujusmodi Ministros constituerunt : quam insolitam Vocationem hætenus ne unico quidem miraculo confirmare poterant ; nec suam Scripturæ interpretationem aliter comprobare, nisi quod dixerint, Scripturam ita accipi & intelligi debere, prout ipsi volebant. Huicquæ Doctrinæ securâ Conscientiâ absque scrupulo credere poteras ? Quare te adeo frivole & insolenter in immensam præcipitanti Æternitatem ? Et ecce, jam de me actum foret, quis putasset ! jam jam resonaret in auribus meis illud omnium horribilissimum : *Ite maledicti in ignem æternum, qui paratus est Diabolo & Angelis ejus. Mat. 25 v. 41.*

72. Sed Clementissime Domine, utique totam fiduciam meam in Christi JESU Meritis, ejusque pretioso Sanguine collocaveram. O temeritatem, non fiduciam ! Nunquid non omnes Sectæ idipsum allegare poterunt ? Sed ex quonam prudenti motivo arbitrari poteras, sicque Scripturam intelligere, quòd

De se-
cura Fi-
ducia
Neo- E-
vangeli-
corum.

quod nimirum talis fiducia ad vitam, consequendam sufficiat? Ergonè id fiducia, & non potius præsumptio, credere te salvarum iri per Christum, licet non curaveris fieri particeps Meritorum ejus, *partim per veram Fidem*, quæ omnia & singula secundum Christi Voluntatem credenda complectitur, & quidem non juxta proprium fallibile judicium sumendo Scripturam, aut explicationem ab hac vel illa Secta recenter inventam, sed juxta interpretationem quam lumen rationis dictabat esse securiorem: *partim per Charitatem*, Spem, timorem DEI, veram cunctaque necessaria in se complectentem pœnitentiam, prout sub interminatione æternæ damnationis præceperam.

73. O Domine, utique credidi in Dominum nostrum JESUM Christum! Etiam *Dæmones credunt* Jac. 2. v. 19. Sed non rectè, non prout oportet, credidisti: non secundum verum Scripturæ sensum, sed juxta pervicacem voluntatem & Spiritum tuum. Non credidisti præterea omnia, quæ & quomodo Christus credenda præceperat. Excluseris

clusi à Fide tua charitatem, humilitatem, obedientiam, Opera bona, & Mandatorum meorum observationem. Propterea experiâre quod Mar. 7. v. 21. prædictum est: *Non omnis qui dixerit mihi Domine Domine intrabit in Regnum Cælorum, sed qui fecerit voluntatem Patris mei.*

74. Ast è converso, si Catholicam Religionem amplexus fuero, potero, cum humilitate & timore DEI sic respondere: DEUS & Redemptor meus: ego credidi secundum Verbum tuum, ejusque sensum & interpretationem non juxta privatum Spiritum meum, aut explicationem alicujus Sectæ instituebam, sed in Antiquissima Romano-Catholica Ecclesia inquirebam. Nec leviter, hîc enim Divinæ Veritatis tuæ sigillum & evidentia credibilitatis indicia suspexeram: e. c. uniformitatem & constantiam Doctrinæ in rebus Fidei: Congregationem Fidelium ex omni totius Orbis Populo, sicut approximas Marci c. 16. Gentium conversionem quæ tibi in hæreditatē datæ sunt, Ps. 2. Innumera Signa & Miracula, sicut pollicitus es Marci 16. v. 17. *Signa autem*

Vera
Christi
na Secu-
ritas &
signa ve-
ræ Eccle-
siæ suc-
cincte
propo-
nuntur

autem eos qui crediderint, hæc sequentur, in nomine meo demonia ejicient &c. super agros manus imponent & bene habebunt &c. Hæc utique Ecclesia mittit Evangelii tui Præcones ad ultimos fines terræ: Hæc ducit suos viâ arcta & per angustam portam in pænitentis & castigationibus corporis, sicut præcepisti. Tot habet Sanctorum Martyrum millia, qui Tui, Tuæque Fidei causâ, in Romana Catholica Religione, ad præsentem usque diem inter Barbaros & Infideles vitam & sanguinem profundunt, quô incessanter Romanam Fidem confirmant atque exoriant. De his aliisque innumeris veritatis, veræque Scripturarum interpretationis signis, utiq; profiteri poteram sicut olim Regius Vates in spiritu prædixerat Ps. 92. *Credibilia facta sunt nimis Testimonia tua Domine.* Quis potuisset sibi prudenter persuadere, hanc Romanam Ecclesiam cum omnibus Doctoribus, Patribus, Martyribus, prodigiorum Patratoribus per tot secula erâsse, Scripturam non rectè intellexisse, nec debitè explanâsse? è contra hunc vel illum abscissum Gregem, jux

a verum Scripturæ sensum docuisse, cujus ipsius nullum aliud afferebatur documentum, nisi quod ita dicerent, Scripturam clarè suæ opinioni favere?

75. Deinde, utique Domine, Petro, ejusque Ecclesiæ manifestè pollicitus es, non prolapsuram fore in errorem : *Tu es Petrus, & super hanc Petram edificabo Ecclesiam meam, & portæ Inferi non prævalebunt adversus eam. Mat. 16. v. 18.* Et iterum : *Oravi pro te ut non deficiat Fides tua, Luc: 22. v. 32.* Tandem, etiam severè præcepisti audire Ecclesiam : *Si non audierit Ecclesiam, sit tibi tanquam Ethnicus & Publicanus. Mat. 18. v. 17.* Igitur Verbo tuo confisus, credidi secundum Verbū tuum ; & captivans fallibilem intellectum meum, subjeci sensui & antiquissimæ Scripturarum Interpretationi Universalis Romanæ Catholicæ Ecclesiæ. Et hæc consideratio adeo in corde meo prævaluerat, ut illicò me resolverim Veritatem perscrutari, quam & facilè affecutus, mox deinde spretis omnibûs humanis respectibus, Fidem Romano-Catholicam amplexus sum.

Qua de
causa
quidam
nolunt
Catho-
licam
Religio-
nem am-
plexi,

76. *Veridicus.* Profectò Dominationis tuæ meditatio non solum ad movendum, verum etiam ad persvadendum. DEUM bonum! quot non reconciliarentur Romanæ Ecclesiæ, modò saltem unicum hoc Fidei punctum, non gravarentur studiosè perpendere? Quanquam, etiam tales reperiuntur præsertim inter eruditiores & ad pietatem præcliviores Dissidentes, qui præfatam veritatem agnoscunt, nihilominus tamen ad Ecclesiæ Gremium converti tergiversantur, idque unicè ob respectum humanum, aut aliud temporale interesse.

77. Nondum Dominatio tua (quoties admirabundus non percontabar?) Fidem Catholicam amplexa est? O mi DEUS! mi Salvator! ingemiscit ad talia. Sed quid suspiria hæc denotant? jam adverto: intellectus agnoscit veritatem, voluntas refragatur: Spiritus promptus, caro autem infirma. Modò hic vel ille, hæc vel illa ad Religionem Catholicam convertantur, convertar & ego. Quid aliàs dicerent? tota uno impetu rueret amicitia. Ut video, hic & hæc viam tibi salutis

salutis intercludunt : sed perpende, num te aliquando respectus hic coram illo tremendo Iudice excusare poterit, qui præceperat Mat: 5. v. 29. *Si scandalizat te oculus tuus dexter, erue eum & projice abs te.* Et iterum Mat. 10. v. 37. *Qui diligit Patrem & Matrem plus quam me, non est me dignus.*

78. *Bonifacius.* Efficax mihi occurrit medium, quo Domini Dissidentes, partim Respectus humanos, partim suorum Prædicantium obices, facile valerent superare, in viam Veritatis reduci atque Ecclesiæ Romanæ reconciliari. Nimirum, si Potestates & Magistratus seculares, quoties succinctum & efficax aliquod *Controversiarum* Opusculum à Catholicis editur, severe suis Prædicantiis mandarent, respondeant, & quidem non longo inanium Verborum apparatu (sicut aliàs consueverunt) verum sic compendiosè, sic dilucidè & expressè, sic nervosè & efficaciter, prout ab Authore Catholico factum. Tunc profectò adverterent omnes, quàm infirma sint Doctrinæ suæ Documenta, quomodo re vera non in Scriptura S. sed potius pri-

privato suo spiritu fundentur, ultimumque suæ Fidei resolutorium sit, quoniam sic dicunt, sic putant, sic volunt Scripturam sumendam esse. Tunc demum fraudes, quæ plerumque copiosis discursuum ambagibus occultari solent; atq. impotentiam tuendi falsitatem, palpabiliter deprehenderent.

79. *Veridicus.* Rem acu tetigisti. Id certè multorum saluti opportunum foret. Talia enim Rescripta unà cum Catholicorum Opusculis compacta exhiberemus benevolo Lectori expendenda atque combinanda, revelatis præterea quotquot superadditæ fuerint, fraudibus. Verùm Prædicatorum malunt prolixioribus Codicibus occupari: In his enim possunt, continuè ab una Materia resilire ad alteram, miras perplexitates, confusiones, mixturas, fascina construere, quibus Lector veluti caliginosa nube involutus existat, unde soli sacri textus de pretioso Christi Sanguine, de Fide salutifera, de immobili fiducia, quasi scintillæ aut stellulæ assiduè promicare solent.

80. *Bonifacius.* Sed fortassis jam sat datum gratissimo colloquio, desistamus

pau-

paulisper : erit tempus hac de re amplius differendi.

Veridicus. Bene est: Interim tamen pro complemento dictorum, unum illis S. Petri Textum insinuandum optarem: Deponentes igitur omnem malitiam, & omnem dolum, & simulationes, & invidias, & omnes detractiones, sicut modo geniti infantes, rationabiles; sine dolo lac concupiscite: ut in eo crescatis in salutem: Si tamen gustatis, quoniam dulcis est Dominus.

I. Petri. c. 2. v. 1. 2. 3.





Biblioteka Jagiellońska



stdr0025515

